

記驗一者於聖教中所有禁戒威儀進止一一歡喜盡力依持乃至命終心无放捨二者但聖所制年一易衣日一受食勸喜敬奉不以爲難亦不妄證云是諸聖權設此教虛引經論言通再受求解脫者不例此戒三者但學已宗清淨法亦不求諸恥敗教四者心常卑下於諸同學而无憎上五者若謂處下流不越居上身爲尊首視衆如已愛無偏黨

五勤修者若有清淨電那勿等內懷慙性當知是師有五記驗一者不樂睡眠妨修道業二者常樂讀誦勵心不怠同學教誨加意喜謝亦不因教心生怨恨已常勸修轉勸餘者三者常樂演說清淨正法四者讚唄禮誦轉誦抄寫繼念思惟如是等时无有虛度五者所持禁戒堅固不缺

六眞實者若有清淨電那勿等內懷眞實性者當知是師有五記驗一者所說經法皆悉眞實一依聖教不妄宣示於有說有於无說无二者心意常以眞實和同不待外緣因而取則三者所持戒行每常眞實若獨若衆心无有二四者常於已師心懷決定盡力承事不生疑惑乃至命終更無別意五

者於諸同學勸令修習以眞實行教導一切

七信心者若有清淨電那勿等內懷信心性者當知是師有五記驗一者信二宗義心淨无疑棄暗從明如聖所說二者於諸戒律其心決定三者於聖經典不敢增減一句一字四者於正法中所有利益心助歡喜若見爲魔之所損惱當起慈悲同心憂慮五者不妄宣說他人過惡亦不嫌謗傳言兩舌性常柔濡質直无二

八忍辱者若有清淨電那勿等內懷忍辱性者當知是師有五記驗一者心恒慈善不生忿怒二者常懷歡喜不起恚心三者於一切處心無怨恨四者心不剛強口无麤惡常以濡語悅可衆心五者若內若外設有諸惡煩惱對值來侵辱者皆能忍受歡喜无怨

九直意者若有清淨電那勿等內懷直意性者當知是師有五記驗一者不爲煩惱之所繫縛常自歡喜清淨直意二者但於法中若大若小所有諮問恭敬領受隨喜善善應答三者於諸同學言无反難不護已短而懷嗔恚四者言行相副心